



CENTRI CIVILNIH INICIJATIVA

PROJEKAT «GRAĐANI I KANTONALNI PARLAMENTI»

**IZVJEŠTAJ
ISTRAŽIVANJE IMPLEMENTACIJE
ZAKONA O SPORTU UNSKO-SANSKOG KANTONA**

Bihać, Novembar 2005.



THE
OLOF PALME
INTERNATIONAL
CENTER

Sadržaj

- Centri civilnih inicijativa
- uvodna riječ
- ciljevi i svrha istraživanja
- ciljne grupe i primijenjena metodologija
- zaključak
- preporuke
- analize i grafički prikazi istraživanja
- Zakon o sportu Unsko-sanskog kantona

Centri civilnih inicijativa (CCI)

Centri Civilnih Inicijativa je bosanskohercegovačka, nevladina organizacija koja djeluje na području cijele Bosne i Hercegovine.

Misija organizacije je da promoviše i podstiče aktivno učešće građana u demokratskim procesima i jača kapacitete pojedinaca i organizacija kako bi uspješno rješavali probleme u svojim zajednicama.

CCI ima urede u Tuzli, Mostaru, Banja Luci, Sarajevu, Doboju i Bihaću.

Osim što je jedna od najistaknutijih nevladinih organizacija na polju zastupanja interesa građana, CCI je veoma aktivan i na međunarodnom planu, posebno sarađujući sa organizacijama Centralne i Jugoistočne Evrope (www.ceecn.net).

CCI radi sa grupama građana, nevladinim organizacijama, ali i pojedincima iz vladinog i nevladinog sektora, kako bi se povećala svijest o potrebi i načinima učešća građana u procesima donošenja odluka na svim nivoima vlasti. CCI pruža usluge treninga i drugih vidova pomoći građanskim grupama i nevladinim organizacijama na polju kreiranja i vođenja kampanja za rješavanje konkretnih problema na svim nivoima.

CCI radi i sa predstavnicima različitih nivoa izvršne i zakonodavne vlasti da bi se inicirali procesi koji će unaprijediti postojeće zakonske regulative i prakse, a rad izabranih predstavnika učinio transparentnijim i građanski orijentisanim. Poseban segment je rad sa zastupnicima u parlamentima na svim nivoima (općinski, kantonalni, entitetski i državni). Građane informiše o radu tih tijela, odlukama koje donose kao i načinima njihovog donošenja. Ciljevi koji se nastoje ostvariti kroz rad sa parlamentima odnose se na uspostavljanje, razvijanje i održavanje dvostrane komunikacije između građana i izabranih predstavnika kako bi se doprinjelo jačanju utjecaja/učešća građana u procesima donošenja odluka na svim nivoima vlasti i samim tim povećanju transparentnosti rada parlamenata u Bosni i Hercegovini.

Projekat: „Građani i kantonalni parlamenti u BiH“

Razlozi za realizaciju projekta:

- Specifična struktura Federacije *Bosne i Hercegovine* koja u svom sastavu ima 10 kantona uvjetuje brojna raslojavanja i podjele nadležnosti i odgovornosti između entiteta, kantona i općina u BiH.
- Građani su slabo upoznati ko šta radi u općinskim i kantonalnim skupštinama, ko je za što nadležan i još važnije ko je odgovoran za brojne probleme s kojima se građani suočavaju.
- Direktna komunikacija sa izabranim predstavnicima kao i pristup informacijama ne spada u uobičajenu praksu rada kantonalnih skupština, stoga održiv sistem informiranja o radu skupština i usvojenim odlukama/zakonima uveliko odsustvuje.

Ciljevi projekta:

- Unaprijediti informisanost javnosti/građana o radu kantonalnih skupština
- Inicirati i razviti interaktivnu komunikaciju građana i izabranih predstavnika u kantonalnim skupštinama
- Ojačati učešće i uticaj građana na procese donošenja odluka (posebno u fazi planiranja) unutar kantonalnih skupština
- Unaprijediti transparentnost rada kantonalnih skupština

Kroz projekt „Građani i kantonalni parlamenti u BiH“, u Tuzlanskom, Hercegovačko-neretvanskom i Unsko-sanskom kantonu, od 2003. godine implementiraju se aktivnosti kojima se nastoji pomoći građanima da bolje razumiju funkcionisanje kantonalnih skupština i prepoznaju potrebu i način na koji se oni mogu uključiti u donošenje odluka na ovom nivou vlasti.

Pored građana kao ciljne grupe, projekat nastupa i prema zastupnicima u parlamentu, jer oni sami kroz razne aktivnosti prolaze i stiču iskustva koja će ih neizostavno dovesti do boljeg razumijevanja svog posla.

Osim redovnih aktivnosti na monitoringu rada parlamenta i izvještavanju javnosti, CCI i brojne nevladine organizacije su se zalagale za rješavanje mnogih pitanja kao odgovor na potrebe zajednica u kojima se ovaj projekt provodi.

Primjeri uspjelih aktivnosti:

- Na inicijativu 11 udruženja građana iz Tuzlanskog kantona izmjenjen je Zakon o socijalnoj zaštiti, zaštiti civilnih žrtava rata i porodica sa djecom.
- U Hercegovačko-neretvanskom kantonu, kantonu koji je bio jedini kanton bez Zakona o socijalnoj zaštiti, CCI i zainteresovane nevladine organizacije su se svojom borbom i zalaganjem izborile za donošenje Zakona o socijalnoj zaštiti.
- Da bi se pružile informacije građanima i približili razni segmenti rada kantonalnog nivoa vlasti, štampane su brošure o nadležnostima i strukturi kantonalne vlasti i brošure o zakonodavnim procedurama u sva tri kantona.

Uvodna rije

Uz dosadašnje aktivnosti praćenja i informiranja građana o radu Skupština, te njihovog uključivanja i aktivnijeg angažmana u procesu donošenja odluka i zakona, u 2004. godini razvijen je model za monitoring implementacije usvojenih odluka/zakona i njihovog utjecaja.

Ova aktivnosti je jedinstvena po svojoj prirodi jer se prvi put pruža nezavisna slika (građanska) o pozitivnim ili negativnim posljedicama jedne odluke ili zakona.

U 2005. godini smo se odlučili pratiti implementaciju jednog od zakona koji je stupio na snagu u protekloj godini, pod pretpostavkom da se učinci njegove implementacije, kao i problemi u provođenju, već osjete među onima kojih se taj zakon izravno dotiče.

Analizirajući prvenstveno razloge i ciljeve donošenja zakona, kao i trenutno stanje sporta u Bosni i Hercegovini odnosno nepostojanje zakona na višim nivoima, Centri civilnih inicijativa su se odlučili za provođenje istraživanja javnosti o implementaciji Zakona o sportu Unsko-sanskog kantona u praksi.



Kantonalno prvenstvo u ženskoj odbojki

Zakon o sportu Unsko-sanskog kantona je prvi donešen zakon iz oblasti sporta u Bosni i Hercegovini, na XV sjednici Skupštine USK-a održanoj 31.01. i 29.02.2000. godine.

Izmjene i dopune Zakona o sportu su usvojene jednoglasno na 27. sjednici Skupštine USK-a, 03.12.2004. godine, jer nedefinisan nivo sredstava za njegovo provođenje iz Budžeta Kantona nije zadovoljavao potrebe i javne interese.

Članom 31. je definirano šta predstavlja javni interes Kantona u oblasti sporta, dok je članom 32. regulirano da se sredstva za realizaciju navedenih potreba i interesa u sportu osiguravaju iz Budžeta Kantona, odnosno općina, a u skladu s mogućnostima. Ovakva neprecizna i široka formulacija člana 32. Zakona o sportu u praksi se pokazala kao nedjelotvorna i dovela oblast sporta u više nego težak položaj.

Kako bi smo imali što pouzdanije informacije o implementaciji Zakona o sportu Unsko-sanskog kantona i zadovoljstvu korisnika u praksi, proveli smo istraživanje šire javnosti. Istraživanjem su bili obuhvaćeni građani, sportske organizacije (udruženja), Sportski savez USK-a, granski i sportski savezi općina USK-a, Kantonalna ministarstava obrazovanja, nauke, kulture i sporta te zdravstva i socijalne politike.

Na ovaj način se osigurala nezavisna ocjena njegove implementacije, a istovremeno prikupile činjenice i informacije o mogućim unapređenjima ovog zakona.

Rezultati istraživanja će biti javno prezentirani na okruglom stolu o nalazima praćenja, a na osnovu dobivenih zaključaka i preporuka kroz debatu će biti kreirane i eventualne preporuke za poboljšanje ovog zakona.

Sistem sporta, na koji se odnosi ovaj zakon, pokriva tjelesni odgoj i obrazovanje, sport i sportsku rekreaciju kao i tjelesni i zdravstveni odgoj, sportsku rekreaciju i sportska takmičenja djece, omladine i drugih građana s tjelesnim oštećenjem.

Sport kao najomiljenija i najmasovnija aktivnost je najefikasnije sredstvo obrazovanja i odgoja najmlađe populacije stanovništva u duhu tolerancije, integracije društva u cjelini, sprečavanja konflikata, uspješnosti borbe protiv alkoholizma, narkomanije i kriminalnih pojava. Dosadašnji način osiguravanja sredstava za razvoj sporta nije rezultirao zadovoljavajućim stepenom obuhvata djece i omladine na Unsko-sanskom kantonu.

Iz navedenih razloga bilo je potrebno preciznije formulirati član 32. Zakona o sportu da bi došli do obavezujućeg, minimalnog procenta sredstava koja se izdvajaju iz Budžeta Kantona (0,5 % - Kanton, 5 % - općine).

Cilj izmjena i dopuna zakona je osiguravanje većih ulaganja u oblast sporta i povećanje obuhvata djece u bavljenju sportom, a što predstavlja zadovoljavanje javnog interesa Kantona u sportu.

Zakon o sportu USK-a rješava i regulira pitanja:

- Ustanova i preduzeća u oblasti sporta (poglavlje II)
- Stručni kadar u sportu (poglavlje V)
- Zdravstveni nadzor u sportu (poglavlje V)
- Javni interes u sportu (poglavlje VI)
- Nadležnosti općina u sportu (poglavlje VII)
- Kaznene odredbe (poglavlje VIII Zakona)
- Nadležne za donošenje propisa (poglavlje IX Zakona)

Ciljne grupe i primijenjena metodologija

Istraživanjem je obuhvaćeno pet ciljnih grupa: *građani* (sportisti, rekreativci, sportski radnici), *udruženja građana* (sportski klubovi), *Kantonalna ministarstva* obrazovanja, nauke, kulture i sporta, i zdravstva i socijalne politike, *Kantonalni sportski savez, općinski i granski sportski savezi*.

Potrebni podaci za izvođenje zaključaka o primjeni ovog zakona dobiveni su tehnikama intervjuja i anketiranjem nadležnih osoba i grupa korisnika, kao i korištenjem prikupljene relevantne dokumentacije (zakon, pravilnici, izvještaji, statuti,...), a istraživanje je provedeno od avgusta do novembra 2005.godine.

Anketni obrasci su ispitanicima proslijeđivani lično, uz pomoć volontera NVO «Gaudeamus» i telefonskim (fax) putem. Za svaku ciljnu grupu izrađen je posebno prilagođen obrazac, koji je pored par istovjetnih pitanja sadržavao i ciljano pitanja karakteristična samo za tu grupu.

Anketni obrazac je ispunilo:

- 50 građana (sportista, rekreativaca, sportskih radnika) Unsko-sanskog kantona
- 15 udruženja građana – sportskih klubova
- odgovorna osoba Kantonalnog ministarstva obrazovanja, nauke, kulture i sporta
- odgovorna osoba Kantonalnog ministarstva zdravstva i socijalne politike
- odgovorna osoba Kantonalnog sportskog saveza
- odgovorne osobe 5 općinskih sportskih saveza
- odgovorne osobe 3 granska sportska saveza

Građani su anketirani ispunjavanjem dobivenih anketnih listića, po sistemu slučajnih uzoraka, a iako su postojali ograničavajući faktori vodilo se računa da ispitanici budu sa teritorija cijelog USK-a. Iz Općine Bihać anketirano je 28 građana, Općine Cazin 7, Općine Velika Kladuša 6, Općine Ključ 4, Općina Bosanska Krupa 3 i Općina Bosanski Petrovac 2 .

Udruženja građana (ŽOK «Ključ», Udruženje pedagoga tjelesnog odgoja Ključ, KK «Unski tigar» Bihać, OK «Bihać», Judo klub «Una» Bihać, ŽOK «Velika Kladuša», OK «Una» Bosanska Krupa,...) su dobila anketni obrazac lično ili putem fax-a i popunile su ga odgovorne osobe, a također se pazilo na zastupljenost općina USK-a.

Na anketne obrazce lično dostavljene Kantonalnim ministarstvima obrazovanja, nauke, kulture i sporta, i zdravstva i socijalne politike odgovorile su gospođe Jasminka Bujanović i Ajnuša Felić, dok je na obrazac dostavljen Kantonalnom sportskom savezu odgovorio gospodin Hasan Hromadžić (sekretar).

Odgovornim osobama iz općinskih i granskih sportskih saveza anketni obrasci su dostavljeni lično ili faksom.

Zaključak

Analiza sprovedenog istraživanja je pokazala da nakon izmjena i dopuna Zakona o sportu Unsko-sanskog kantona (Službeni glasnik Unsko-sanskog kantona, broj 12/2004), koje su stupile na snagu u decembru 2004. godine, doživljava u skoro svim segmentima primjenu u praksi. A to jasno pokazuje da nedefinisan nivo sredstava za provođenje Zakona iz Budžeta Kantona nije zadovoljavao potrebe i javne interese i onemogućavao je primjenu.

Sport u BiH, doživljava sigurno najveću krizu jer nepostoji zakonska regulativa, na državnom i entitetskim nivoima, a samim tim je neregulisano finansiranje i odnos prema sportu i sportašima. Građani prije svega sportisti, sportski radnici i rekreativci moraju inicirati donošenje okvirnog Zakona o sportu BiH da bi se regulisalo pitanje ulaganja i sponzorstva u sportu.

Sportski savez USK-a izborio se za trajno i sistemsko rješenje finansiranja jednog dijela potreba. Poslanici Skupštine USK-a imali su razumjevanja i prihvaćen je prijedlog sportskih radnika da se za potrebe sporta izdvaja 0,5 % od ukupnih sredstava kantonalnog budžeta, a iz općinskih budžeta 5 %, te se izdvajanje regulisalo i zakonski.

Zakonske odredbe su ispoštovale i općine Bihać i Sanski Most dok u ostalih šest općina USK-a sportaši, sportski radnici, udruženja i klubovi tek trebaju naći zajedničku riječ sa općinskim vijećima.

Svi anketirani smatraju da su potrebna veća sredstva za zadovoljavanje potreba i javnog interesa Kantona u sportu i predlažu povećanje izdvajanja iz kantonalnog budžeta na 1 % od ukupnih sredstava u tekućoj godini.

Sport na USK-u je zadnjih godina bio u veoma teškom položaju i bilježio sve slabije rezultate jer uložena sredstva nisu mogla osigurati kvalitetnije plasmane na domaćem i međunarodnom planu, ali ovogodišnji rezultati naročito klupskih sportova govore o podizanju kvalitete i daju pravo za optimizam u narednim godinama.

Pristupanje Sportskog saveza USK-a izradi Strategije razvoja sporta USK-a do 2015. godine na osnovu Zakona o sportu USK-a, kojim se određuju potrebe i interesi društva u sportu, i pozivaju i se na Evropsku povelju o sportu, koja tjelesni odgoj i sport smatra važnim segmentom ljudskog razvoja zaslužuje pohvale i podršku.



Javna rasprava o Strategiji razvoja sporta Unsko-sanskog kantona do 2015. godine

Zajedni ka inicijativa za uspostavu Više škole za sportske trenere na Odsjeku za sport i tjelesni odgoj, Pedagoškog fakulteta u Bihaću i Kantonalnog sportskog saveza je sigurno kapitalan projekt čiji rezultati trebaju biti stručni kadrovi i treba je maksimalno podržati.

O današnjem stručnom kadru u sportu na USK-u nije potrebno puno govoriti jer ako se zna da na kantonu nepostoji atletski trener ne možemo govoriti o razvoju jednog od tri bazična sporta. Također otvaranje velikog broja privatnih sportskih škola (odbojka, košarka, nogomet, borilački sportovi,...) sa upitnim stručnim kadrom dovodi u pitanje poštuju li se zakonom utvrđene obaveze.

Podsticati rad na podizanju nivoa stručnosti trenera i sportskih radnika i osposobiti ih u informatičkom pogledu (Internet). Edukovati sportiste i sportske radnike o sportskom marketingu, na načinima lobiranja i pisanja projekata.



Prezentacija Više škole za sportske trenere na Odsjeku za sport i tjelesni odgoj pri Pedagoškom fakultetu u Bihaću

Na području osam općina USK-a aktivno djeluje oko 180 sportskih organizacija sa preko 15000 registrovanih sportista u 27 sportskih disciplina, a sportom se povremeno bavi oko 30000 ili 10 % stanovnika USK-a, što govori da je Kanton sportski razvijena sredina.

Segment zdravstvene zaštite sportaša možemo reći da nepostoji jer Ministarstvo zdravstva i socijalne politike nije donijelo podzakonske akte odnosno nije propisalo zdravstveni nadzor koji vrši sportski dispanzer radi kontrole stanja zdravlja u esnika aktivnosti u sportu i sportskoj rekreaciji prije početka i u toku trajanja, nije propisalo zdravstveni nadzor kod pružanja hitne medicinske pomoći i takmičarima, drugim učesnicima i prisutnim licima na sportskim takmičenjima i priredbama, i još neke obavezujuće zakonske akte. Da bi se to realiziralo neophodno je mijenjati, odnosno dopuniti član 30. Zakona o sportu u smislu organiziranja Kantonalnog zavoda za sportsku medicinu uz ispunjavanje propisanih uvjeta za rad.

Do sada nije bilo izricanja kazni pa čak ni pismenih prijava za slučajevne kršenja Zakona o sportu od strane nadležnih organa na osnovu nadzora ili utvrđenih nepravilnosti u radu, a ni prijava kršenja odredbi od strane građana ili udruženja, što sigurno ne pokazuje realnu sliku.

A sportske organizacije su osnovane radi organizovanja aktivnosti u sportu i moraju osiguravati određene uslove: odgovarajući stručni kadar, sportski objekat i zdravstveni nadzor kao i održavanje reda za vrijeme trajanja sportskih takmičenja i priredbi.

I ako uzmemo samo broj sportskih objekata koji ispunjavaju standarde za međunarodna takmičenja govori o veoma lošem stanju sportske infrastrukture, a velik broj neispunjava ni osnovne standarde za domaća takmičenja ili treniranje (npr. temperatura u dvoranama, nepostojanje gimnastičke dvorane na cijelom kantonu...).

Građani (sportisti, rekreativci, sportski radnici,...) nemaju dovoljno informacija o Zakonu o sportu USK-a, a također ne poznaju nadležnosti Kantonalnog ministarstva obrazovanja, nauke, kulture i sporta i Sportskog saveza USK-a. Građani žele biti bolje upoznati sa radom, obavezama i ulogom Kantonalnog i općinskih sportskih saveza kao i na načinima uspostave komunikacije s odgovornim osobama.

Kako je razvojem informatizacije i modernizacije u Bosni i Hercegovini i Svijetu internet postao najjači medij, dostupan javnosti 24 sata dnevno, ovim sredstvom je neophodno predstaviti sport i sportiste sa područja USK-a. **Potrebno je da se rad i rezultati Sportskog saveza, odnosno njegovih članica, prezentiraju kroz web stranicu na internetu i redovno ažuriraju da bi se omogućio pristup informacijama svim zainteresovanim (građani, sportisti, novinari, sponzori...).**

Da bi mlade generacije pokazali prednosti sporta raditi na prepoznatljivosti sportaša sa Unsko-sanskog kantona a naročito vrhunskih sportaša.

Sportski rezultati sportista i klubova sa USK-a nedovoljno se prate jer je nedovoljno razvijena mreža medija i nepostoji kritički osvrt novinara na organizacijske propuste i rezultatske neuspjehe. Neophodno je unaprijediti medijsko praćenje sporta edukovanjem i poboljšavanjem statusa novinara jer je nedvojbeno da je nestručno i neadekvatno, ali i odgovorne sportske radnike u klubovima i savezima upoznati sa ulogom medija i marketinga u sportu te mogu postati saradnje.

Javno prezentirati kriterije i pravilnike na osnovu kojih se obezbjeđuju uslovi i sredstva za rad i takmičenje, a godišnje izdavati uz izvještaj o radu pregled rezultata svih članica sportskog saveza.


Kroz javne rasprave / debate (okrugle stolove, konferencije,...) sa sportistima i sportskim radnicima obrađivati teme koje se odnose na unaprjeđenje kvalitete rada, uslova i rezultata u sportu, razmjenu informacija i rješavanje identifikovanih problema.

Volonterski i humanitarni rad sportista i sportskih radnika podići na viši nivo, tako da određene aktivnosti (npr. humanitarne utakmice,...) postanu tradicionalne i praksa.

Preporuke

Kako bi se unaprijedilo provođenje Zakona o sportu USK-a, te se kao posljedica njegove primjene osjetilo poboljšanje u sportu i kvalitetniji odnos prema sportašima i sportskim radnicima, slobodni smo na osnovu rezultata istraživanja predložiti slijedeće preporuke:

1. Mijenjati, odnosno dopuniti član 30. Zakona u smislu organiziranja Kantonalnog zavoda za sportsku medicinu uz ispunjavanje propisanih uvjeta za rad
2. Unaprijediti odredbe zakona koje definišu potrebe i javni interes Kantona u sportu u segmentu finansiranja sporta (posebno vrhunskog sporta) i u smislu instrumenata primjene i sistema kontrole
3. Povećati sredstva za zadovoljavanje potreba i javnog interesa u sportu koja se osiguravaju iz Budžeta USK-a povećati na 1 % od ostvarenih prihoda u tekućoj godini
4. Nadležno ministarstvo bi trebalo ispitati ili provesti istraživanje o provođenju zakona u općinama (općinskim vijećima i sportskim savezima) i preduzeti potrebne mjere za otklanjanje eventualnih problema (kršenje zakonskih odredbi ili neprovedivost zakona), uticati na općinska vijeća da ispoštuju zakonsku odluku o najmanje 5 % sredstava iz budžeta općina za sport
5. Uspostaviti internet portal sa informacijama o sportu na USK-u. Općinski i granski sportski savezi kao i sportski klubovi redovno da dostavljaju informacije o radu (najave sportskih takmičenja i manifestacija) i rezultatima
6. Upoznati građane s nadležnostima Kantonalnog ministarstva obrazovanja, nauke, kulture i sporta i Sportskog saveza USK-a kao i općinskim kroz sve vidove informisanja i prezentiranja (mediji, publikacije, internet – web stranica SS USK-a,...), a pri predstavljanju sporta USK-a potrebno je istaknuti na koje uspostave kontakta sa Kantonalnim, općinskim i granskim sportskim savezima, klubovima, ... (adresa, telefon, e-mail,...)
7. Više ulagati u ženski sport te uključiti što više žena u rukovodeće organe saveza i klubova
8. Nadležna ministarstva i SS USK-a bi trebali inicirati medijske događaje (tematske emisije, reklame i sl.) kako bi se nivo svijesti javnosti podigao na viši nivo po pitanju rekreacije
9. Razvijati školski sport i sportsku rekreaciju - „Sport za sve“
10. Podsticati izgradnju sportskih terena i objekata



Analiza istraživanja mišljenja pomoćnika ministra obrazovanja, nauke, kulture i sporta USK-a

Rezultati istraživanja se zasnivaju na analizi anketiranog pomoćnika ministra obrazovanja, nauke, kulture i sporta USK-a.

Prije svega mora se napomenuti da ne postoji zakonska regulativa viših nivoa vlasti o oblasti sporta. Istraživanje je pokazalo da Ministarstvo nije izradilo sve podzakonske akte koji su potrebni za implementaciju Zakona o sportu izuzev Pravilnika o raspodjeli sredstava, ali je potrebne akte za provođenje zakona donijela Skupština Sportskog saveza USK-a.

Prilikom donošenja Zakona o izmjenama i dopunama Zakona o sportu nadležno ministarstvo je organiziralo i provelo javnu raspravu.

Ministarstvo posjeduje registar sportskih organizacija USK-a, ali ne i podatke o tome koliko ustanova odnosno preduzeća u oblasti sporta radi u USK-u na osnovu rješenja Kantonalnog ministarstva obrazovanja, nauke, kulture i sporta, i koja su, što govori da se odredbe poglavlja II (čl. 8-13) Zakona o sportu USK-a ne provode ili ne u potpunosti.

Izmjenom visine osiguranih sredstava, iz Budžeta USK-a, za programe regulisane Zakonom o sportu ocjena je da će djelomično doprinijeti zadovoljavanju potreba i interesa društva.

Do sada nije bilo ulaganja prijava u slučajeve kršenja Zakona o sportu od strane nadležnih organa na osnovu nadzora ili utvrđenih nepravilnosti u radu.

Nije bilo ni slučajeva prijave kršenja odredbi Zakona o sportu od strane građana ili udruženja, pa tako ni kažnjavanja prekršaja novčanom kaznom, što pokazuje da do sada nije bilo razloga ili svijest na nedovoljnoj razini.

Strategija razvoja sporta na Unsko-sanskom kantonu trenutačno je u izradi odnosno provodi se javna rasprava, a na osnovu Zakona o sportu USK-a kojim se određuju potrebe i javni interesi kantona.

Skupština USK-a daje tumačenje potreba i javnih interesa kantona.

Sportske organizacije dužne su uskladiti svoje statute s odredbama Zakona o sportu, kao i Zakonom o udruženjima i fondacijama.

Sa pozicije odgovorne osobe ministarstva Zakon o sportu USK-a je vrlo dobar i jednostavan za primjenu ali nije i u potpunosti proveden odnosno određene odredbe što znači da se oblast sporta još može unaprijediti.

Analiza istraživanja mišljenja pomoćnika ministra zdravstva i socijalne politike USK-a

Rezultati istraživanja se zasnivaju na analizi anketiranog pomoćnika ministra zdravstva i socijalne politike USK-a.

Ministarstvo nije izradilo podzakonske akte koji su potrebni za implementaciju Zakona o sportu, a iako postoji zakonska regulativa viših nivoa vlasti o zdravstvu u oblasti sporta.

Ministarstvo nije propisalo zdravstveni nadzor koji vrši sportski dispanzer radi kontrole stanja zdravlja učesnika aktivnosti u sportu i sportskoj rekreaciji prije početka i u toku trajanja, jer je isti regulisan Zakonom o zdravstvenoj zaštiti koji sprovodi Kantonalni zavod za sportsku medicinu kojeg ovaj Kanton nema.

Ne vrši se analiza dobijenih rezultata kontrole stanja učesnika aktivnosti u sportu i sportskoj rekreaciji prije početka i u toku trajanja.

Nije propisan zdravstveni nadzor kod pružanja hitne medicinske pomoći takmičarima, drugim učesnicima i prisutnim licima na sportskim takmičenjima i priredbama.

Na Kantonu nepostoji kontrola uzimanja i primanja zabranjenih stimulativnih i doping sredstava sportistima.

Potrebno je mijenjati, odnosno dopuniti član 30 Zakona u smislu organiziranja Kantonalnog zavoda za sportsku medicinu uz ispunjavanje propisanih uvjeta za rad.

Do sada nije bilo uloženi prijava u slučajeve kršenja Zakona o sportu po pitanju zdravstvenog nadzora od strane nadležnih organa, a nije bilo ni slučajeva prijave od strane građana ili sportskih organizacija za kršenje odredbi Zakona o sportu po pitanju zdravstvenog nadzora.

Odgovorna osoba ministarstva je djelomično zadovoljna a mišljenja je da se Zakon o sportu primjenjuje se uz poteškoće, ali da za unaprjeđenje treba promijeniti zakonske odredbe vezane za zdravstvo i obezbijediti uslove za kvalitetan rad.



NK „Jedinstvo“ Bihać – jedini Premier ligaš sa USK-a

Analiza istraživanja mišljenja odgovornih osoba Sportskog saveza Unsko-sanskog kantona

Rezultati istraživanja se zasnivaju na analizi anketiranog sekretara i dijaloga sa predsjednikom SS USK-a.

Sportski savez je uskladio svoje akte sa Zakonom o sportu USK-a.

Program rada Sportskog saveza utvrđuje se na bazi programa članica Saveza (8 sportskih saveza općina USK-a i 9 granskih saveza), te na bazi postojeće generalne koncepcije razvoja sporta USK-a.

Članovi sportskog saveza su sportski savezi općina USK-a i granski-strukovni savezi USK-a, koji moraju biti registrirani kod Kantonalnog ministarstva pravde. Sportski savez posjeduje registar sportskih organizacija USK-a.

Saradnja sportskog saveza i članica se odvija tako što su u organima saveza predstavnici svih članica, a isti dostavljaju svoje planove i programe koji su osnova planiranja. Planovi i programi te projekti Sportskog saveza USK-a su zajednički za sve članice i zajednički se realiziraju.

Sportski savez pruža stručnu i drugu pomoć svojim članicama organiziranjem stručnih seminara, sugestijama u izradi planova rada, izradom potrebnih akata i slično.

Promociju svojih članica SS USK-a sprovodi redovnim informiranjem javnosti, nadležnih institucija, dodjelom društvenih priznanja iz oblasti sporta...

Pravilnikom o kriterijima za raspodjelu sredstava namijenjenih iz Budžeta USK-a za oblast sporta (isti usvojen od Vlade USK-a) se vrši podjela finansijskih sredstava članicama.

Pravilnik o raspodjeli sredstava usvojen je od strane Skupštine SS USK-a, tretira potrebe i interese društva u oblasti sporta u smislu Zakona o sportu, a posebno sufinansiranje programa rada članica, programa razvoja sportova invalida, pomoć vrhunskom sportu, razvoj školskog sporta i razvoj sportske infrastrukture, te edukacija kadrova u sportu.

Analizom i usvajanjem traženih izvještaja od svojih članica se vrši kontrola rada članica odnosno informacijama o načinu trošenja sredstava koje članice dobiju od sportskog saveza.

Izmjenom visine osiguranih sredstava iz Budžeta USK-a u Zakonu o sportu djelomično će se doprinijeti zadovoljavanju potreba i interesa društva.

Sportski savez je učestvovao u javnoj raspravi o izmjenama i dopunama Zakona o sportu izradom

Do sada samo jedan slučaj prijave (usmeno) od strane građana ili udruženja o kršenju odredbi Zakona o sportu, po pitanju primjene člana 32. Zakona o sportu USK-a, u dijelu koji se odnosi na izdvajanje najmanje 5% od ostvarenih prihoda Budžeta općine za financiranje sporta (samo dvije općine ispoštovale).


Odgovorna osoba Kantonalnog sportskog saveza je zadovoljna Zakonom o sportu USK-a i smatra da se lako primjenjuje.

Analiza istraživanja mišljenja odgovornih osoba općinskih i granskih sportskih saveza USK-a

Rezultati istraživanja se zasnivaju na analizi anketiranih i intervjuisanih odgovornih osoba općinskih i granskih sportskih saveza USK-a.

Svi općinski i granski sportski savezi su uskladili svoje akte sa Zakonom o sportu.

Da li se izmjenom visine (povećanjem) osiguranih sredstava iz Budžeta USK-a u Zakonu o sportu doprinosi zadovoljavanju potreba i interesa društva?



Program rada općinskih i granskih saveza se utvrđuje na osnovu iskazanog interesa članica saveza odnosno na bazi programa članica SS (npr. Bihać – 52 klubova) te na programu i planu rada SS, gdje donosi odluku Skupština SS (koju čine svi klubovi).

SS Općine Bihać i na osnovu donešene Strategije razvoja sporta općine Bihać 2004-2008.godina.

Član sportskog saveza mogu biti svi oni koji ispunjavaju uslove propisane aktima sportskog saveza, registrovani kod nadležnog ministarstva pravde i da djeluju na području koje pokriva savez, a savezi posjeduju registre sportskih klubova.

Sportski savezi i članice saraduju direktnim (usmenim) ili pismenim komuniciranjem, a u organima SS su predstavnici klubova (upravni odbor) gdje isti klubovi dostavljaju svoje planove i programe za tekuću godinu koji su osnova naših planiranja i usvajaju se na Skupštini saveza.

Sportski savezi pružaju stručnu i drugu pomoć svojim članicama kroz finansijsku podršku, sugestijama, planovima rada i drugim aktima, a kroz sredstva informisanja rade na promociji svojih članica.

Sportski savezi vrše kontrolu rada članica putem godišnjih finansijskih izvještaja, pregledom završnih računa prihoda i rashoda, te kroz programe rada članica saveza.

Prema utvrđenim kriterijima o raspodjeli sredstava prema članicama se vrši podjela finansijskih sredstava, ali i na osnovu odluka Skupštine.


Svaki anketirani sportski savez ima pravilnik o raspodjeli sredstava, a pravilnik je kreiran prema kriterijima koji mogu biti: stepen takmičenja, masovnost, više selekcija, a na osnovu odluke upravnog odbora i Skupština.

Putem predstavnika saveza (50% - polovina anketiranih) u SS USK-a koji su učestvovali u javnim raspravama i donošenju zakona i sportski savezi su učestvovali u javnoj raspravi o izmjenama i dopunama Zakona o sportu.

Općinski i granski sportski savezi su zadovoljni radom i rezultatima Sportskog saveza USK-a.

Nije bilo slučajeva prijave od strane građana ili udruženja o kršenju odredbi Zakona o sportu.


Mišljenje općinskih i granskih sportskih saveza o Zakonu o sportu USK-a




Analiza istraživanja mišljenja odgovornih osoba udruženja građana/sportskih klubova USK-a

Rezultati istraživanja se zasnivaju na analizi anketiranih i intervjuisanih odgovornih osoba udruženja građana/sportskih klubova USK-a. Skoro svi klubovi uključeni u istraživanje su uskladili svoj statut sa Zakonom o sportu, a svi su članovi sportskih saveza općina.

Znate li da je na snazi Zakon o sportu USK-a?



Da li ste učestvovali u izradi programa rada sportskog saveza?




Svi su upoznati sa činjenicom da ne postoji zakonska regulativa viših nivoa vlasti o oblasti sporta, jer se zadnjih mjeseci često ta činjenica ističe u sredstvima javnog informisanja. Većina klubova smatra da im sportski savez pruža stručnu i drugu pomoć, kroz redovno dobijanje izvještaja SS, obavještanje o aktivnostima i terminima predavanja polugodišnjeg i godišnjeg izvještaja, pozivanju na seminare i tribine, a najviše kroz finansijsku pomoć po kategorizaciji SS.

Također većina udruženja/klubova radi na promociji svojih aktivnosti kroz pomoć u stručno-pedagoškom radu, TV i radio nastupe, javne prezentacije, najave takmičenja, pravljenjem programa rada za školska takmičenja, RVI, rekreativne programe za žene (aerobik, strečing, joga, meditacija,...), otvaranjem škola sporta (masovnost), učešćem u projektima NVO-a, održavanjem web stranica...

Kako sportski savez vrši kontrolu rada članica poznaje manji broj odgovornih u klubovima (po pismenim izvještajima koje dobije od klubova, obilaskom sportskih dvorana u vrijeme treninga,...), ali i među njima određen broj sumnja da većina klubova šalje svoje izvještaje, a kamoli finansijske planove o utrošku sredstava, što je dovoljan pokazatelj da uglavnom nema povratne informacije od klubova.


Da li će se izmjenom visine osiguranih sredstava iz Budžeta USK-a u Zakonu o sportu doprinijeti zadovoljavanju potreba i interesa društva?




Podjela finansijskih sredstava članicama se vrši na osnovu kategorizacije (Bihać) ili starih odluka UO (Ključ).

Primjetno je da veliki dio sredstava ide za fudbal, sredstva idu i na kotizacije sportskih klubova u ligama a gdje je ostatak se ne zna jer uglavnom nema završnog računa klubova. Nezadovoljstvo udruženja/klubova je zbog načina raspodjele jer se rijetko cijene rezultati, masovnost, rang takmičenja, stručnost trenera,...

Da li ste učestvovali u javnoj raspravi o izmjenama i dopunama Zakona o sportu?




Mišljenje udruženja-sportskih klubova o Zakonu o sportu USK-a



Analiza istraživanja mišljenja građana (sportista, rekreativaca, sportskih radnika,...) USK-a

Rezultati istraživanja se zasnivaju na analizi anketiranih i intervjuisanih građana USK-a. Građane zanimaju odredbe odnosno regulative koje se nalaze u Zakonu o sportu. Od anketiranih građana niko nije učestvovao u javnoj raspravi o izmjenama i dopunama Zakona o sportu.


Znate li da je na snazi Zakon o sportu USK-a?




Sportisti uglavnom rade na promociji sportskih aktivnosti, kroz prezentacije vještina i zdravog života, te volonterskim radom kao treneri mlađih kategorija.

Građani ne znaju na osnovu čega i na koji način se vrši podjela finansijskih sredstava članicama, niti imaju informacije o načinu trošenja sredstava koje članice dobiju od sportskog saveza.


Da li ste učestvovali u izradi programa rada sportskog saveza (kantonalnog, općinskog, granskog)?




Da li ste član nekog sportskog kolektiva?




Da li ste i na koji način imali stručnu i drugu pomoć u sportskim aktivnostima (predavanja, seminari,...)?



Da li će se izmjenom visine osiguranih sredstava iz Budžeta USK-a u Zakonu o sportu doprinijeti zadovoljavanju potreba i interesa društva?



Mišljenje građana o Zakonu o sportu USK-a



Na osnovu člana 5(1)C, odjeljak B. poglavlja V Ustava Unsko-sanskog kantona Skupština Unsko-sanskog kantona, na prijedlog Vlade Unsko-sanskog kantona, na 15. sjednici održanoj 31.01. i 29.02.2000. godine, donijela je

ZAKON O SPORTU

I OSNOVNE ODREDBE

Član 1.

Sistem sporta, u smislu ovog zakona, obuhvata tjelesni odgoj i obrazovanje, sport i sportsku rekreaciju.
Sistem sporta osoba s tjelesnim oštećenjima u smislu ovog zakona obuhvata tjelesni i zdravstveni odgoj, sportsku rekreaciju i sportska takmičenja djece, omladine i drugih građana s tjelesnim oštećenjem.

Član 2.

Tjelesni odgoj i obrazovanje obuhvata tjelesne i sportske aktivnosti djece i omladine.
Aktivnosti iz prethodnog stava ostvaruju se u okviru nastavnih programa rada osnovnih i srednjih škola i visokoškolskih ustanova kao i u okviru sportskog takmičenja i sportske rekreacije.

Član 3.

Sport obuhvata:

- organizirane aktivnosti djece i omladine i drugih građana koje se ostvaruju u okviru stručno usmjerenog tjelesnog vježbanja i sportskog treninga,
- posebno organizirane aktivnosti s sportskim talentima i pripreme sportista za svjetska i evropska prvenstva, mediteranske i olimpijske igre, uz primjenu savremenih metoda rada,
- sportska takmičenja i priredbe.

Aktivnosti iz alineje 2. prethodnog stava smatraju se vrhunskim sportom.

Sport građana s tjelesnim oštećenjima obuhvata:

- organizirane aktivnosti djece, omladine i ostalih građana u okviru stručno usmjerene tjelesne aktivnosti u cilju očuvanja narušenog zdravstvenog stanja i podizanja nivoa tjelesnih sposobnosti i u cilju sportskog takmičenja,
- organizirane aktivnosti s sportskim talentima i pripreme sportista za svjetska, evropska prvenstva i paraolimpijske igre uz primjenu savremenih metoda rada u posebnim sportskim organizacijama.

Na sport građana s tjelesnim oštećenjem shodno se primjenjuju odredbe ovog zakona.

Član 4.

II USTANOVE I PREDUZEĆA U OBLASTI SPORTA

Član 8.

Javnu ustanovu za obavljanje djelatnosti iz oblasti sporta može osnovati Skupština Kantona, općinsko vijeće općine samostalno ili s drugom pravnom odnosno fizičkom osobom. Ustanovu za obavljanje djelatnosti iz oblasti sporta može osnovati domaća odnosno strana pravna i fizička osoba (osnivač) u svim oblicima svojine za obavljanje:

- stručno-razvojnih poslova praćenja tjelesnih sposobnosti djece i omladine, studenata, invalida i drugih kategorija građana,
- testiranje i pripremu vrhunskih sportista,
- edukaciju i trening sportskih talenata.

Javno preduzeće za proizvodnju, promet i usluge u oblasti sporta može osnovati Skupština Kantona, općinsko vijeće jedne, dvije ili više općina.

Osnivači preduzeća iz prethodnog stava mogu biti i druge domaće i strane pravne osobe i domaće i strane fizičke osobe.

Javna preduzeća mogu se osnovati za obavljanje djelatnosti:

- održavanje sportskih objekata,
- sportsko izdavaštvo.

Aktom o osnivanju određuje se naziv, djelokrug i druga pitanja od značaja za rad ustanove, odnosno preduzeća.

Osnivač ustanove, odnosno preduzeća u oblasti sporta osigurava sredstva potrebna za osnivanje i rad ustanove, odnosno preduzeća.

Odnos između osnivača i ustanove, odnosno preduzeća u oblasti sporta uređuje se ugovorom, u skladu s aktom o osnivanju.

Član 9.

Ustanova, odnosno preduzeće u oblasti sporta može se osnovati ako ima odgovarajući kadar, prostor i opremu za obavljanje svog predmeta poslovanja.

Ustanova, odnosno preduzeće u oblasti sporta može početi rad na osnovi rješenja Kantonalnog ministarstva obrazovanja, nauke, vjere i sporta.

Zahtjev za izdavanje rješenja iz prethodnog stava podnosi se najkasnije 30 dana prije početka rada ustanove, odnosno preduzeća.

Član 10.

Direktora ustanove, odnosno preduzeća u oblasti sporta imenuje upravni odbor na osnovi javnog konkursa na period od četiri godine, uz saglasnost osnivača.

Za direktora ustanove, odnosno preduzeća u oblasti sporta može biti imenovana osoba koja, pored općih uvjeta za zasnivanje radnog odnosa, ima visoku stručnu spremu i tri godine radnog iskustva u oblasti sporta.

Član 11.

Ustanova, odnosno preduzeće u oblasti sporta može vršiti statusne promjene samo uz prethodnu saglasnost osnivača.

Član 12.

Ustanova, odnosno preduzeće u oblasti sporta može prestati raditi ako ne ispunjava uvjete i zadatke radi kojih je osnovano, ili ako ne postoji potreba za njegovim radom, na osnovi odluke osnivača ustanove, odnosno preduzeća.

Član 13.

Nadzor nad zakonitošću rada ustanove, odnosno preduzeća u oblasti sporta vrši Kantonalno ministarstvo obrazovanja, nauke, vjere i sporta.

Kada Kantonalno ministarstvo obrazovanja, nauke, vjere i sporta utvrdi da ustanova, odnosno preduzeće ne ispunjava uvjete u smislu člana 9. stav 1. ovog zakona, odredit će rok u kojem ustanova ili preduzeće mora otkloniti utvrđene nedostatke.

Ukoliko nedostaci ne budu otklonjeni, osnivač će donijeti odluku o prestanku rada ustanove, odnosno preduzeća.

III ORGANIZIRANJE AKTIVNOSTI U SPORTU I SPORTSKOJ REKREACIJI

Član 14.

Organiziranjem aktivnosti u sportu iz člana 3. stav 1. alineja 1. i 2. ovog zakona može se baviti organizacija osnovana radi ostvarivanja tih aktivnosti (u daljem tekstu: sportska organizacija), pod uvjetom da osigura odgovarajući stručni kadar, sportski objekat i zdravstveni nadzor.

Organiziranjem sportskih takmičenja i priredbi iz člana 3. stav 1. alineja 3. ovog zakona može se baviti sportska organizacija pod uvjetom da osigura održavanje reda za vrijeme trajanja takmičenja ili priredbi i zdravstveni nadzor.

Održavanje reda za vrijeme trajanja takmičenja ili priredbi vrši se pod uvjetima i na način utvrđen zakonom i općim aktom odgovarajućeg sportskog saveza.

Član 15.

Organiziranjem aktivnosti u sportu iz člana 3. stav

Sportisti i vrhunski sportisti mogu se aktivnostima iz prethodnog stava baviti i profesionalno, pod uvjetima i na način utvrđen statutom odgovarajućeg sportskog saveza.

Sportistima i vrhunskim sportistima smatraju se i građani s tjelesnim oštećenjima koji se bave sportom u smislu stava 1. i 2. ovog člana.

Strukovni savezi Kantona će utvrditi kriterije za kategorizaciju vrhunskih sportista u roku od 3 mjeseca od dana stupanja na snagu ovog zakona.

Kategorizacija sportista invalida u cilju homogenizacije takmičarskih grupa vrši se shodno vrsti i visini invalidnosti u skladu s međunarodnim propozicijama takmičenja.

Član 21.

Sportska organizacija, u skladu s zakonom, će sportistu koji se amaterski bavi aktivnostima iz stava 1. prethodnog člana osiguravati prava na zdravstvenu zaštitu ako ih ne ostvaruje po drugoj osnovi, opremu, rekvizite, naknadu plaće i novčane i druge nagrade za ostvarene sportske rezultate.

Sportska organizacija, u skladu s zakonom, će vrhunskom sportistu koji ne ostvaruje prava iz penzijskog i invalidskog osiguranja po drugom osnovu, uplaćivati doprinose za penzijsko i invalidsko osiguranje.

Član 22.

Sportisti ne smiju uzimati niti smiju primati stimulaturna i doping sredstva koja mogu biti štetna za njihovo zdravlje ili život.

V STRUČNI KADAR, SPORTSKI OBJEKTI I ZDRAVSTVENI NADZOR

Član 23.

Stručnim kadrom u smislu ovog zakona smatraju se osobe:

- s visokom i višom stručnom spremom iz sporta,
- s visokom, višom ili srednjom stručnom spremom iz drugih oblasti i stručno osposobljene za trenersko i drugo zvanje na fakultetu za fizičku kulturu;
- s statusom vrhunskog sportista koje su stručno osposobljene za trenersko i drugo zvanje na fakultetu za fizičku kulturu, pedagoškom fakultetu odsjek sport i višoj trenerskoj školi.

Stručni kadar učestvuje u ostvarivanju aktivnosti u sportu i sportskoj rekreaciji pod stručnim nadzorom.

Član 24.

Bliže uvjete u vezi s stručnom spremom i osposobljenosti iz stava 1. alineje 1. i 2. i stručni nadzor iz stava 2. prethodnog člana propisuje ministar Kantonalnog ministarstva obrazovanja, nauke, vjere i sporta.

Član 25.

Sportski objekti u smislu ovog zakona su građevinski objekti, plivališta, klizališta, trim-staze, skijaški tereni i drugi uredeni zatvoreni i otvoreni objekti i površine namijenjeni ostvarivanju aktivnosti u sportu i sportskoj rekreaciji.

Član 26.

Sportski objekti uređeni po međunarodnim pravilima kao otvoreni objekti ili površine u šumi, na zemljištu, vodi, vodotoku., koja osiguravaju održavanje svjetskih i evropskih prvenstava i olimpijskih igara su u vlasništvu osnivača.

Nad sportskim objektima iz prethodnog stava pravo raspolaganja, korišćenja i upravljanja održavanja vrši osnivač.

Kanton može prenijeti na općinu na području Kantona pravo upravljanja i korišćenja nad pojedinim objektom iz prethodnog stava.

Skupština Kantona će posebnim aktom odrediti sportske objekte nad kojim prenosi prava upravljanja i korišćenja na općinu.

Kanton zadržava pravo nadzora nad vršenjem prenesenih prava iz prethodnog stava te ukoliko utvrdi da općina ne vrši prenešenu nadležnost, može to pravo vratiti na Kanton.

Član 27.

Općinsko vijeće i Skupština Kantona kada vrši pravo upravljanja i korišćenja nad sportskim objektima iz prethodnog člana može prenijeti, na osnovi konkursa, pravo korišćenja nad tim objektima drugoj pravnoj i fizičkoj osobi koje se bave organizovanjem aktivnosti u sportu ili sportskoj rekreaciji.

Pravo korišćenja prenosi se ugovorom, kojim se uređuju međusobna prava i obaveze, a posebno uvjeti kojima se osigurava namjensko i racionalno korišćenje, čuvanje i održavanje sportskih objekata iz prethodnog člana.

Član 28.

Namjena sportskih objekata iz člana 25. ovog zakona, u pravilu, ne može se mijenjati.

U slučaju da se mijenja namjena postojećeg sportskog objekta, Kanton je dužan osigurati objekat iste namjene.

Član 29.

Pod zdravstvenim nadzorom u smislu ovog zakona podrazumijeva se:

- kontrola stanja zdravlja djece i omladine i drugih građana prije početka i u toku trajanja aktivnosti u sportu i sportskoj rekreaciji,
- pružanje hitne medicinske pomoći takmičarima, drugim učesnicima i prisutnim licima na sportskim takmičenjima i priredbama,
- kontrola uzimanja i primanja zabranjenih stimulativnih i doping sredstava sportistima.

Član 30.

Ostvarivanje zdravstvenog nadzora iz alineja 1. i 2. prethodnog člana vrši sportski dispanzer, a djelokrug rada propisuje ministar Kantonalnog ministarstva zdravstva.

Zdravstveni nadzor iz alineje 3. prethodnog člana vrši se na osnovi liste koju je utvrdila medicinska komisija Međunarodnog olimpijskog komiteta.

VI POTREBE I INTERESI DRUŠTVA U SPORTU

Član 31.

Javni interes Kantona u sportu predstavljaju:

- učešće u pripremi sportskih talenata i vrhunskih sportista za svjetska i evropska prvenstva, mediteranske i olimpijske igre,
- stručno-razvojni poslovi praćenja tjelesnih sposobnosti djece i omladine kao i drugih građana,
- sistemsko ostvarivanje aktivnosti djece i omladine u raznim oblicima sporta,
- usavršavanje sportskog podmlatka, male olimpijske igre i drugi oblici dječijeg i omladinskog sporta,
- studentski i invalidski sport,
- obnova i izgradnja sportskih objekata od interesa za Kanton.

Član 32.

Sredstva za zadovoljavanje potreba i interesa društva iz prethodnog člana osiguravaju se iz budžeta Kantona. Općine će u skladu s svojim mogućnostima izdvajati potrebna sredstva za finansiranje određenih programa na svom području.

Član 33.

Raspodjelu sredstava iz budžeta Kantona za potrebe i interese društva utvrđene članom 31. ovog zakona vrši Kantonalni sportski savez na osnovi pravilnika o raspodjeli sredstava.

Raspodjelu sredstava iz budžeta općina za potrebe i interese društva utvrđeno članom 31. ovog zakona vrše općinski sportski savezi na osnovi pravilnika o raspodjeli sredstava.

Član 34.

Saglasnost o broju profesionalnih radnika u Kantonalnom sportskom savezu daje Kantonalno ministarstvo obrazovanja, nauke, vjere i sporta.

Saglasnost o broju profesionalnih radnika u općinskom sportskom savezu daje općina.

Član 35.

Javna ustanova u oblasti sporta stiće sredstva za zadovoljavanje potreba i interesa društva iz člana 31. od alineje 2. do 5. ovog zakona, iz budžeta Kantona, na osnovi realizacije godišnjeg programa rada, a u skladu s poslovima i zadacima utvrđenim ovim zakonom.

Sredstva za zadovoljavanje potreba i interesa društva iz člana 31. od alineje 2. do 5. ovog zakona, iz budžeta Kantona i budžeta općine može sticati u oblasti sporta čiji je osnivač druga domaća pravna i fizička osoba i strana pravna fizička osoba, ako se na taj način osigurava racionalnije korišćenje sredstava i kvalitetnije obavljanje poslova i zadataka.

Član 36.

Ustanove u oblasti sporta mogu sticati prihode i:

- prodajom intelektualnih i materijalnih dobara i usluga,
- iz prihoda na osnovi autorskih prava i patenata,
- iz legata, poklona i zavještanja,
- iz drugih izvora.

Član 37.

Sredstva za zadovoljavanje potreba i interesa društva iz člana 31. alineja 1. ovog zakona mogu sticati iz budžeta Kantona sportske organizacije, sportski savezi i druge pravne i fizičke osobe.

Član 38.

Sredstva za zadovoljavanje potreba i interesa društva iz člana 31. od alineje 2. do 5. ovog zakona mogu sticati iz općinskog budžeta sportske organizacije od općinskog značaja, organizacije za sportsku rekreaciju i druge pravne i fizičke osobe.

Član 39.

Sportska organizacija i organizacija za sportsku rekreaciju stiču sredstva od članarina i iz drugih izvora utvrđenih Zakonom o udruživanju građana ("Službene novine Federacije BiH" broj 61/95.).

VII POSLOVI LOKALNE SAMOUPRAVE I PRENESENI POSLOVI KANTONALNE UPRAVE

Član 40.

Općina, u okviru samoupravnog djelokruga:

- uređuje sistem sportskih takmičenja na nivou općine (Član 3. Zakona),
- organizira sportske priredbe (Član 3.),
- osigurava sredstva za zadovoljavanje potreba i interesa društva u sportu (Član 3.),
- sistematski ostvaruje aktivnosti djece, omladine i drugih građana u različitim oblicima sportskog vježbanja (član 31., alineja 3.),
- usavršava sportski podmladak, organizira male olimpijske igre i 3 drugja

1.ke

VIII KAZNENE ODREDBE

Član 42.

Novčanom kaznom od 500 do 5.000 KM kaznit će se za prekršaj ustanova u oblasti sporta ako počne rad bez rješenja Kantonalnog ministarstva obrazovanja, nauke, vjere i sporta (član 9.stav 2.).

Za prekršaj iz prethodnog stava kaznit će se i odgovorna osoba u ustanovi u oblasti sporta novčanom kaznom 100 do 1.000 KM.

Za prekršaj iz stava 1. ovoga člana kaznit će se fizička osoba novčanom kaznom od 30 do 300 KM.

Član 43.

Novčanom kaznom od 500 do 5.000 kaznit će se za prekršaj sportska organizacija i druga pravna osoba ako organizira aktivnosti u sportu bez odgovarajućeg stručnog kadra, sportskog objekta i zdravstvenog nadzora (Član 14., stav 1., Član 16., Član 23., stav 2., Član 24., Član 25., Član 29., alineja 1. i Član 30., stav 1.).

Član 44.

Novčanom kaznom od 500 do 5.000 KM kaznit će se sportska organizacija, sportski savez i druga pravna osoba ako ne osigurava održavanje reda i zdravstveni nadzor za vrijeme trajanja sportskog takmičenja i priredbe (Član 14., stav 2. i 3., Član 16., Član 29., alineja 2. i 3. i Član 30.).

Za prekršaj iz prethodnog stava kaznit će se i odgovorna osoba u sportskoj organizaciji, sportskom savezu i drugoj pravnoj osobi novčanom kaznom od 100 do 1.000 KM.

Za prekršaj iz stava 1. ovog člana kaznit će se fizička osoba novčanom kaznom od 30 do 300 KM.

Član 45.

Novčanom kaznom od 500 do 5.000 KM kaznit će se za prekršaj organizacija za sportsku rekreaciju i druga pravna osoba ako organizira aktivnosti u sportskoj rekreaciji bez odgovarajućeg stručnog kadra, sportskog objekta i zdravstvenog nadzora (Član 19., 23., 24. i 25. i Član 29. alineja 1. i Član 30. stav 1.).

Za prekršaj iz prethodnog stava kaznit će se i odgovorna osoba u organizaciji za sportsku rekreaciju i drugoj pravnoj osobi novčanom kaznom od 100 do 1.000 KM.

Za prekršaj iz stava 1. ovog člana kaznit će se fizička osoba novčanom kaznom od 30 do 300 KM.

Član 46.

Novčanom kaznom od 500 do 5.000 KM kaznit će se za prekršaj sportski savez ako ne utvrdi sistem sportskih takmičenja u skladu s oblikom sportskih takmičenja na svjetskim i evropskim prvenstvima ili olimpijskim igrama (Član 18. stav 1.)

Za prekršaj iz prethodnog stava kaznit će se i odgovorna osoba u sportskom savezu novčanom kaznom od 100 do 1.000 KM.

IX PRIJELAZNE I ZAVRŠNE ODREDBE

Član 47.

Ministar koji rukovodi Kantonalnim ministarstvom obrazovanja, nauke, vjere i sporta dužan je donijeti propis iz člana 24.ovog zakona u roku od šest mjeseci od dana stupanja na snagu ovog zakona.

Ministar koji rukovodi Kantonalnim ministarstvom zdravstva dužan je donijeti propis iz člana 30. stav 1. ovog zakona u roku od šest mjeseci od dana stupanja na snagu ovog zakona.

Član 48.

Do donošenja propisa iz člana 20. i člana 30. stav 1. ovog zakona primjenjivat će se Pravilnik o stručnoj spremi i drugim uslovima za obavljanje stručnog rada u organizacijama za fizičku kulturu ("Službeni list SRBiH", broj 16/87.) i Pravilnik o zdravstvenom nadzoru lica koja se organizovano bave sistematskim fizičkim vježbama i sportskim aktivnostima ("Službeni list SRBiH" broj 30/82.)

Član 49.

Postojeće ustanove i preduzeća koja djeluju u oblasti sporta dužne su uskladiti svoje akte s ovim zakonom u roku od tri mjeseca od dana njegovog stupanja na snagu.

Član 50.

Ovaj zakon stupa na snagu osmog dana od dana objavljivanja u "Službenom glasniku Unsko-Sanskog Kantona."

Broj: 01-1-169/00
Bihać, 29.02.2000.godine

Predsjedavajući Skupštine
Unsko-sanskog kantona
Adem Borić

Na osnovu člana V A2. 11b. Ustava Unsko-sanskog kantona - prečišćeni tekst ("Službeni glasnik Unsko-sanskog kantona", broj 1/04), Skupština Unsko-sanskog kantona, na prijedlog Vlade Unsko-sanskog kantona, na 27. sjednici održanoj dana 03.12.2004. godine, doni

Pripremili:

Saša Smiljanić

*Centri civilnih inicijativa, ured Bihać
Cazinska 30, 77 000, USK, BiH
tel: ++387 (0)37 312 - 938
fax: 037 312 - 938
e-mail: ccibi@bih.net.ba
web: www.ccibh.org*

Izdavač:

Centri civilnih inicijativa

*Projekt "Građani i kantonalni parlamenti u BiH" je finansijski podržan od strane
Olof Palme International Centra i SIDA-e iz Švedske.*